

Na osnovu člana 20. stav 4. Zakona o udruženjima i fondacijama („Službene novine Federacije BiH“, broj 45/02), a u vezi sa tačkom I stav 1. Odluke o osnivanju Fondacije za izdavaštvo („Službene novine Federacije BiH“ broj 95/07), Vlada Federacije Bosne i Hercegovine na 59. sjednici, održanoj 18. 6. 2008. godine, donosi

## **STATUT**

### **FONDACIJE ZA IZDAVAŠTVO**

#### **I - OSNOVNE ODREDBE**

##### **Član 1.**

Ovim Statutom uređuju se:

- 1) naziv i sjedište Fondacije za izdavaštvo (u daljem tekstu: Fondacija);
- 2) ciljevi i djelatnost Fondacije;
- 3) organi Fondacije, njihova ovlaštenja, način imenovanja i opoziva članova organa Fondacije, trajanje mandata, kvorum i pravila glasanja, uključujući i specifična pitanja o kojima se odlučuje kvalifikovanom većinom;
- 4) zastupanje i predstavljanje Fondacije;
- 5) oblik i sadržaj pečata Fondacije;
- 6) oblik i sadržaj znaka Fondacije;
- 7) pravila korištenja sredstava Fondacije;
- 8) moguće korisnike sredstava Fondacije;
- 9) postupak za donošenje Statuta, izmjena i dopuna Statuta i drugih općih akata Fondacije;
- 10) način usvajanja i podnošenja finansijskog izvještaja i izvještaja o radu Fondacije;
- 11) uvjete i postupak za pripajanje, razdvajanje, transformaciju ili prestanak rada Fondacije;
- 12) pravila za raspodjelu imovine Fondacije u slučaju prestanka rada Fondacije;
- 13) druga pitanja značajna za ciljeve i djelatnost Fondacije.

#### **II – NAZIV I SJEDIŠTE FONDACIJE**

##### **Član 2.**

Naziv Fondacije je: Fondacija za izdavaštvo.

Sjedište Fondacije je u Sarajevu, ulica Obala Maka Dizdara broj 2.

### **III - CILJEVI I DJELATNOST FONDACIJE**

#### **Član 3.**

Osnovni cilj Fondacije je podsticanje, stimulisanje, razvoj, unapređivanje i modernizacija izdavaštva a naročito u domenu:

- stvaralaštva pisaca, prevodilaca, dizajnera i kolektivnog stvaralaštva u izdavaštvu;
- objavljivanje knjiga, časopisa publikacija orijentiranih prema kulturi;
- distribucije i prodaje knjiga i elektronskog izdavaštva;
- promoviranje knjiga i elektronskog izdavaštva;
- stimuliranja stvaralaca, institucija, udruženja i asocijacija;
- tehnoloških inovacija u sektoru izdavaštva;
- očuvanja kulturnih vrijednosti;
- projekata naučno-istraživačkog karaktera;
- gostovanja stvaralaca u inostranstvu;
- edukacije kadrova;
- povezivanja i razmjene informacija i iskustva sa sličnim asocijacijama van granica Federacije Bosne i Hercegovine;
- nekomercijalnih projekata.

### **IV - ORGANI FONDACIJE, NJIHOVA OVLAŠTENJA, NAČIN IMENOVANJA I OPOZIVA ČLANOVA ORGANA FONDACIJE, TRAJANJE MANDATA, KVORUM I PRAVILA GLASANJA, UKLJUČUJUĆI I SPECIFIČNA PITANJA O KOJIMA SE ODLUČUJE KVALIFIKOVANOM VEĆINOM**

#### **Član 4.**

Organ upravljanja Fondacijom je Upravni odbor.  
Upravni odbor čine predsjednik i dva člana.

#### **Član 5.**

Predsjednika i članove Upravnog odbora imenuje Vlada Federacije Bosne i Hercegovine iz reda stvaralaca, naučnih, kulturnih i drugih javnih ličnosti, na prijedlog federalnog ministra kulture i sporta.

Mandat predsjednika i članova Upravnog odbora Fondacije traje četiri godine, s tim da mogu biti još jednom imenovani nakon isteka mandata.

Predsjednik Upravnog odbora je ovlašten za zastupanje i predstavljanje Fondacije.

Predsjednik i članovi Upravnog odbora primaju naknadu za rad u Upravnom odboru, u skladu sa Pravilnikom o naknadama za rad na poslovima Fondacije.

## **Član 6.**

Osnivač može, na prijedlog federalnog ministra kulture i sporta, razriješiti predsjednika i članove Upravnog odbora i prije isteka mandata, ako se utvrdi da je odgovoran za nezakonit ili neuspješan rad Fondacije, na lični zahtjev, kao i u drugim slučajevima utvrđenim zakonom.

Osnivač imenuje privremenog člana Upravnog odbora na mjesto razriješenog člana, na prvoj narednoj sjednici, na prijedlog federalnog ministra kulture i sporta, do provođenja procedure u skladu sa članom 7. ovog statuta.

## **Član 7.**

Postupak imenovanja i razrješenja predsjednika i članova Upravnog odbora Fondacije vrši se u skladu sa Zakonom o ministarskim, vladinim i drugim imenovanjima Federacije Bosne i Hercegovine („Službene novine Federacije BiH“, br. 12/03 i 34/03).

## **Član 8.**

Upravni odbor vrši sljedeće poslove:

- ostvaruje ciljeve Fondacije utvrđene ovim statutom;
- daje saglasnost na pravne radnje preuzete u ime Fondacije prije njenog upisa u registar;
- upravlja imovinom Fondacije;
- vrši izmjene i dopune Statuta uz prethodnu saglasnost federalnog ministra kulture i sporta;
- imenuje lice ovlašteno za zastupanje i predstavljanje Fondacije;
- predlaže osnivaču pripajanje, razdvajanje, transformaciju ili prestanak rada Fondacije;
- priprema finansijske i druge izvještaje;
- donosi planove poslovanja Fondacije;
- utvrđuje poslovnu politiku i strategiju razvoja Fondacije;
- donosi godišnje programe rada;
- odlučuje o raspodjeli i upotrebi sredstava;
- donosi Pravilnik o procedurama i kriterijima za izbor korisnika sredstava Fondacije,
- imenuje osobu koja će zastupati Fondaciju, u slučaju kada je za to spriječen predsjednik Upravnog odbora;
- donosi Poslovnik o radu Upravnog odbora Fondacije;
- donosi Pravilnik o naknadama za rad na poslovima Fondacije;
- donosi i druge akte iz nadležnosti rada Fondacije;
- radi i druge poslove u skladu sa ovim statutom i zakonom.

## **Član 9.**

Upravni odbor održava redovne i vanredne sjednice.

Vrijeme održavanja redovnih sjednica, za koje se dostavljaju pozivi članovima, utvrđuje se Poslovnikom o radu Upravnog odbora Fondacije.

Vanredne sjednice se sazivaju na temelju pismeno obrazloženog zahtjeva.

Sjednice Upravnog odbora saziva predsjednik Upravnog odbora, u skladu sa Poslovníkom o radu Upravnog odbora.

Predsjednik je dužan zakazati sjednicu, na prijedlog premijera Vlade Federacije Bosne i Hercegovine, federalnog ministra kulture i sporta i najmanje dva člana Upravnog odbora, u skladu sa Poslovníkom o radu Upravnog odbora.

### **Član 10.**

Upravni odbor odlučuje o svim pitanjima većinom glasova ukupnog broja članova, ukoliko ovim Statutom i Poslovníkom o radu Upravnog odbora nije drugačije propisano.

O svim pitanjima Upravni odbor odluke donosi nakon diskusije i usaglašavanja stavova.

Nakon što se odluka donese potrebnom većinom svi članovi Upravnog odbora dužni su je se pridržavati.

U slučaju sukoba interesa predsjednika ili člana Upravnog odbora proisteklog iz članstva u nekom tijelu ili organu, ili ličnim odnosom s nekom osobom ili institucijom, a u vezi sa predmetom rasprave i odlučivanja Upravnog odbora, predsjednik odnosno član obavezni su iskazati sukob interesa.

U slučaju sukoba interesa predsjednika ili člana Upravnog odbora, Upravni odbor ne može odlučivati o tom pitanju, o čemu je dužan obavijestiti podnosioca zahtjeva.

Za svoj rad i rezultate rada, Upravni odbor odgovoran je Vladi Federacije Bosne i Hercegovine.

### **Član 11.**

Prisutnost predsjednika i svih članova Upravnog odbora Fondacije je obavezna za donošenje slijedećih odluka:

- o upravljanju imovinom Fondacije,
- o izmjenama i dopunama Statuta Fondacije i
- o pripajanju, razdvajanju, transformaciji ili prestanku rada Fondacije.

## **V – STRUČNI I OPERATIVNO TEHNIČKI POSLOVI**

### **Član 12.**

Stručne i operativno tehničke poslove za potrebe Fondacije obavljaju kvalifikovana stručna lica putem ugovora o djelu.

Lica koja će obavljati ove poslove bira Upravni odbor Fondacije na prijedlog federalnog ministra kulture i sporta.

Lica stalno zaposlena u Federalnom ministarstvu kulture i sporta ne mogu obavljati stručne i operativno tehničke poslove za potrebe Fondacije.

Naknada za obavljanje stručnih i operativno tehničkih poslova utvrđuje se Pravilnikom o naknadama za rad na poslovima Fondacije.

## **Član 13.**

Stručni i operativno tehnički poslovi za potrebe Fondacije su:

- pravni i operativno tehnički i
- finansijsko računovodstveni poslovi.

Pravne i operativno tehničke poslove obavlja sekretar Fondacije, koji je diplomirani pravnik.

Finansijsko računovodstvene poslove obavlja diplomirani ekonomista.

Odabrana stručna lica staraju se o realizaciji zakonskih obaveza, rokovima za izvršavanje tih obaveza i o tome blagovremeno izvještavaju Upravni odbor Fondacije.

Za svoj rad odabrana stručna lica odgovaraju Upravnom odboru Fondacije.

Stručne i operativno tehničke poslove odabrana stručna lica obavljaju za potrebe Fondacije za izdavaštvo i Fondacije za bibliotečku djelatnost.

## **VI – OBLIK I SADRŽAJ PEČATA FONDACIJE**

### **Član 14.**

Fondacija ima pečat i štambilj.

Pečat Fondacije je okruglog oblika, promjera 35 mm, na čijem obodu je ispisan slijedeći tekst: „Fondacija za izdavaštvo“, a vodoravno u sredini pečata, „Sarajevo“, kao sjedište Fondacije.

Štambilj Fondacije je pravougaonog oblika 60 x 30 mm i sadrži naziv i sjedište Fondacije: „Fondacija za izdavaštvo – Sarajevo“, te „Broj“ i „Datum“, sa prostorom za upisivanje broja i datuma.

## **VII – OBLIK I SADRŽAJ ZNAKA FONDACIJE**

### **Član 15.**

Fondacija ima znak u obliku stilizirane knjige srebrene boje.

## **VIII – PRAVILA KORIŠTENJA SREDSTAVA FONDACIJE I MOGUĆI KORISNICI SREDSTAVA FONDACIJE**

### **Član 16.**

Pravilnik o procedurama i kriterijima za izbor korisnika sredstava Fondacije (u daljem tekstu Pravilnik) je akt kojim se obezbjeđuje transparentno korištenje sredstava Fondacije radi ostvarivanja ciljeva Fondacije.

Pravilnik donosi Upravni odbor većinom glasova ukupnog broja članova.

Pravilnik se objavljuje u «Službenim novinama Federacije BiH».

### **Član 17.**

Pravilnik obavezno sadrži:

- osnove za korištenje sredstva Fondacije;
- način raspoređivanja sredstava po različitim osnovama;
- kriterije za izbor korisnika sredstva Fondacije;
- proceduru za izbor korisnika sredstava Fondacije;
- druga pitanja značajna za zakonit i efikasan rad Fondacije.

## **Član 18.**

U svrhu kontrole namjenskog korištenja sredstava od strane korisnika sredstava Fondacije, Upravni odbor će Pravilnikom o procedurama i kriterijima za izbor korisnika sredstava ustanoviti instrumente i način provjere.

## **IX – NAČIN USVAJANJA I PODNOŠENJA FINANSIJSKOG IZVJEŠTAJA I IZVJEŠTAJA O RADU**

### **Član 19.**

Upravni odbor za svaku poslovnu godinu donosi finansijski plan Fondacije, koji je sastavni dio godišnjeg programa rada Fondacije.

Program rada i finansijski plan usvaja Upravni odbor većinom ukupnog broja članova.

Na kraju poslovne godine donosi se godišnji obračun prihoda po istom postupku kao i finansijski plan.

### **Član 20.**

Plan poslovanja Fondacije zajedno sa finansijskim planom i godišnjim planom rada, te izvještajem o radu sa godišnjim obračunom, podnose se jednom godišnje Vladi Federacije Bosne i Hercegovine putem Federalnog ministarstva kulture i sporta.

### **Član 21.**

U Fondaciji se uredno vode poslovne knjige i sastavljaju finansijski izvještaji u skladu sa zakonom i drugim propisima.

### **Član 22.**

Nadzor nad namjenskim korištenjem i raspolaganjem sredstvima Fondacije vrši Federalno ministarstvo finansija-Federalno ministarstvo financija.

### **Član 23.**

Nadzor nad zakonitošću rada Fondacije vrši Federalno ministarstvo kulture i sporta.

## **X – UVJETI I POSTUPAK ZA PRIPAJANJE, RAZDVAJANJE, TRANSFORMACIJU ILI PRESTANAK RADA FONDACIJE**

### **Član 24.**

Fondacija prestaje sa radom kada prestane svrha njenog osnivanja.

Vlade Federacije Bosne i Hercegovine donosi odluku o pripajanju, razdvajanju, transformaciji ili prestanku rada Fondacije.

Odlukom o prestanku rada Fondacije utvrđuje se način zaštite prava korisnika sredstava Fondacije i druga pitanja od značaja za prestanak rada Fondacije.

## **XI – PRAVILA ZA RASPODJELU IMOVINE U SLUČAJU PRESTANKA RADA FONDACIJE**

U slučaju prestanka rada Fondacije odluku o raspodjeli preostale imovine Fondacije donosi Vlada Federacije Bosne i Hercegovine, na prijedlog federalnog ministra kulture i sporta.

Ukoliko Vlada Federacije ne donese odluku o raspodjeli imovine Fondacije do dana brisanja iz registra, preostala njena imovina dodjeljuje se drugoj fondaciji koja obavlja istu ili sličnu djelatnost, a registrovana je na području Federacije Bosne i Hercegovine.

Odlukom iz stava 1. ovog člana reguliše se način ostvarivanja ranije stvorenih prava i obaveza Fondacije.

## **XII - OSTVARIVANJE JAVNOSTI RADA FONDACIJE**

### **Član 26.**

Rad Fondacije je javan, a ostvarivanje ovog načela ne može biti u suprotnosti sa interesima i poslovanjem Fondacije.

### **Član 27.**

Javnost rada Fondacije ostvaruje se podnošenjem izvještaja o radu i finansijskom poslovanju Federalnom ministarstvu kulture i sporta i Vladi Federacije Bosne i Hercegovine.

### **Član 28.**

Predsjednik Upravnog odbora ili lice koje ovlasti Upravni odbor može davati podatke i obavještavati sredstva javnog informisanja, kao i odlučivati o sazivanju konferencija za štampu i ostvarivati druge vidove saradnje sa sredstvima javnog informisanja.

### **XIII - PRIJELAZNE I ZAVRŠNE ODREDBE**

#### **Član 29.**

Stupanjem na snagu ovog statuta prestaje da važi Statut Fondacije za izdavaštvo, br.: 02-03 od 28.11.2001. godine, 02-340/03 od 29.08.2003. godine, 02-537/05 od 30.05.2005. godine i 02-DD-021/08 od 22.01.2008. godine.

Ovaj statut stupa na snagu danom donošenja.

V broj: 541/2008  
18. 6. 2008. godine  
Sarajevo

**P R E M I J E R**

**Dr. Nedžad Branković**

Na osnovu člana 20. stav 4. Zakona o udruženjima i fondacijama („Službene novine Federacije BiH“, broj: 45/02 i 85/07) i člana 8. alineja 4. Statuta Fondacije za izdavaštvo V broj: 541/2008 od 18. 6. 2008. godine, Upravni odbor Fondacije za izdavaštvo, po prethodnoj saglasnosti federalnog ministra kulture i sporta, na 18 sjednici održanoj 27. 4. 2009. godine, donio je

## **ODLUKU O IZMJENAMA I DOPUNAMA STATUTA FONDACIJE ZA IZDAVAŠTVO**

### **Član 1.**

U Statutu Fondacije za izdavaštvo (u daljem tekstu: Fondacija) u članu 8. iza alineje 5. dodaju se alineje 6. i 7. koje glase:

„-donosi odluke o angažovanju stručnih lica u Fondaciji;  
-odlučuje o pravima, obavezama i odgovornostima iz radnog odnosa za zaposlena stručna lica u Fondaciji.“

### **Član 2.**

Poglavlje „V – STRUČNI I OPERATIVNO TEHNIČKI POSLOVI“ mijenja se i glasi: „V – STRUČNI I ADMINISTRATIVNO TEHNIČKI POSLOVI.“

### **Član 3.**

U članu 12. riječ „operativno-tehnički“ zamjenjuje se riječju „administrativno-tehnički“ u odgovarajućim padežima.

U stavu 1. riječ „djelu“ zamjenjuje se riječju „radu“.

Stav 3. briše se.

Stav 4. postaje stav 3., mijenja se i glasi: „Prava, obaveze i odgovornosti iz radnog odnosa zaposlenih u Fondaciji regulišu se posebnim pravilnikom u skladu sa Zakonom o radu Federacije BiH („Službene novine Federacije BiH“, broj: 43/99, 32/00 i 29/03).“

### **Član 4.**

U članu 13. riječ „operativno-tehnički“ zamjenjuje se riječju „administrativno-tehnički“ u odgovarajućim padežima.

U stavovima 4. i 5. riječ „odabrana“ zamjenjuje se riječju „zaposlena“.

Stav 6. briše se.

### **Član 5.**

Ova Odluka stupa na snagu danom donošenja.

Broj:02-147/09  
Sarajevo, 27. 4. 2009. godine

PREDSJEDNIK  
UPRAVNOG ODBORA  
Mile Stojić

Na osnovu člana 20. stav 4. Zakona o udruženjima i fondacijama („Službene novine Federacije BiH“, broj: 45/02 i 85/07) i člana 8. alineja 4. Statuta Fondacije za izdavaštvo V broj: 541/08 i broj: 02-147/09, Upravni odbor Fondacije za izdavaštvo, po prethodnoj saglasnosti federalnog ministra kulture i sporta, na 18. sjednici održanoj 27. 4. 2009. godine, donio je

**ODLUKU  
O IZMJENI STATUTA  
FONDACIJE ZA IZDAVAŠTVO**

**Član 1.**

U Statutu Fondacije za izdavaštvo (u daljem tekstu: Fondacija) član 15. mijenja se i glasi:

„Fondacija ima znak.

Znak Fondacije je otvorena knjiga na podlozi oblika kvadrata.“

**Član 2.**

Ova Odluka stupa na snagu danom donošenja.

Broj: 02-278/09  
Sarajevo, 2. 7. 2009. godine

PREDSJEDNIK  
UPRAVNOG ODBORA

Mile Stojić

Na osnovu člana 24. Zakona o udruženjima i fondacijama („Službene novine Federacije BiH“, broj: 45/02 i 85/07) i člana 8. alineja 4. Statuta Fondacije za izdavaštvo V broj: 541/08, broj: 147/09 i 02-278/09, Upravni odbor Fondacije za izdavaštvo, po prethodnoj saglasnosti federalne ministrice kulture i sporta, na 49. sjednici održanoj 24. 8. 2020. godine, donosi

**ODLUKU  
O DOPUNI STATUTA  
FONDACIJE ZA IZDAVAŠTVO**

**Član 1.**

U Statutu Fondacije za izdavaštvo V broj: 541/08, broj: 147/09 i 02-278/09, u članu 2. dodaje se stav 3. koji glasi: „Naziv Fondacije na engleskom jeziku je: Publishing Foundation“.

**Član 2.**

Ova Odluka stupa na snagu danom donošenja.

Broj: 04-3-101/2020  
Sarajevo, 24. 8. 2020. godine

PREDSJEDNIK  
UPRAVNOG ODBORA

Ivan Sivrić

Na osnovu člana 24. Zakona o udruženjima i fondacijama („Službene novine Federacije BiH“, broj: 45/02 i 85/07) i člana 8. stavak 4. Statuta Fondacije za izdavaštvo V broj: 541/08, broj: 147/09, 02-278/09 i 04-3-101/2020 Upravni odbor Fondacije za izdavaštvo, po prethodnoj saglasnosti federalne ministricе kulture i sporta, na 4. sjednici održanoj 22. 7. 2025. godine, donosi

**ODLUKU  
O IZMJENI STATUTA  
FONDACIJE ZA IZDAVAŠTVO**

**Članak 1.**

U Statutu Fondacije za izdavaštvo (u daljem tekstu: Fondacija) članak 7. mijenja se i glasi: Postupak imenovanja i razrješenja predsjednika i članova Upravnog odbora Fondacije vrši se u skladu sa Zakonom o ministarskim, vladinim i drugim imenovanjima Federacije Bosne i Hercegovine („Službene novine Federacije BiH“, br. 12/03 i 34/03 i 65/13).

**Članak 2.**

Dodaje se u članku 9, stavak 6 koji glasi: „Sjednice Upravnog odbora Fondacije se mogu održavati uživo, putem telefona ili putem video linka.“

**Članak 3.**

Članak 12. mijenja se i glasi:

„Stručne i administrativno-tehničke poslove Fondacije obavljaju kvalificirana stručna lica putem ugovora o radu te po potrebi ugovorom o djelu.“

**Članak 4.**

Članak 13. mijenja se i glasi:

Svi stručni i administrativno tehnički poslovi i radna mjesta u Fondaciji definirani su u Pravilniku o radu Fondacije za izdavaštvo.

**Članak 5.**

Ova Odluka stupa na snagu danom donošenja.

Broj: 04-1-2-53/25

Sarajevo, 22.7.2025. godine

PREDSJEDNIK  
UPRAVNOG ODBORA

Mario Mikulić